

六經同卷

既九

迦葉赴佛般涅槃經

瑜伽翳迦訖沙囉烏瑟尼沙斫訖囉真言

安怛陀那儀則一字頂輪王

瑜伽經

佛入涅槃密迹金剛力士哀戀經

佛使比丘迦旃延說法沒盡偈經

佛治身經

治意經

迦葉赴佛般涅槃經

東晉竺曇無蘭譯

昔佛在世時摩訶迦葉於諸比丘中最長年
高才明智慧其身亦有金色相好佛每說法
常與其對坐人民見之或呼為佛師於是迦
葉乃辭佛到伊蔭黎山中一山名普能周旋
數千里去舍衛國二萬六千里多出七寶甘
果不貲名香好藥栴檀三種其一種芳香一
種治人百病一種可用染五色衆香雜藥不
可稱數亦有走翔鳥獸師子豺狼白象騏驎

朱鳥鳳凰或有清淨異學道士時有方石平
正其色如瑠璃縱廣百二十里奇樹蔭涼華
葉五色冬夏茂盛列生石上迦葉前後教授
一千弟子皆清淨高行得羅漢者常坐此石
誦經行道又有清淨甘果泉水周旋三十里
其側生優曇華青蓮華紺色華紅色華紫色
華迦葉弟子七人同夕得夢其一比丘夢見
所坐方石中央分破樹皆根拔復一比丘夢
見四十里泉水皆乾竭華悉零落一比丘夢
見拘羅邊坐皆傾毀一比丘夢閻浮利地皆

傾陷一比丘夢見須彌山崩一比丘夢見金
輪王薨一比丘夢見日月墮地天下失明晨
起各以所夢啓迦葉迦葉告言我曹前見光
明地時大動卿等復得是夢佛將般泥洹即
勅諸弟子往赴俱夷那竭國道見婆羅門持
文陀羅華迦葉即問言卿從何來欲何所至
那得是天華答言我從那竭國來時佛泥洹
已經七日諸天往赴悉持天華天香供養佛
身此華即是迦葉聞是語便自投於地啼泣
而言佛今般泥洹三界失明將復何依恃彼

師將諸弟子進道未到數百里便見四天王
及梵釋諸天皆持七寶蓋名香好華悉作十
二部音樂亦有阿須輪王諸大鬼神側塞空
中又具俱夷那竭國王及諸隣國王各從其
群僚數百萬人見迦葉將諸弟子到是時國
貴末羅王則勅國人民皆令避道使迦葉及
弟子得進阿那律出迎相見言佛般泥洹已
七日耶維大不然但待賢者到阿難見迦葉
便自投此地啼哭不自勝有一老比丘名波
或即止阿難言止止佛在時常禁制我等不

得自由佛今泥洹吾等得自在莫復啼哭時
有天聞波或語即舉手搏之迦葉便前接待
天止之謂波或言佛今般泥洹一切失所恃
汝獨愚癡而反喜快波或聞是語竟即得阿
羅漢迦葉便與弟子俱頭面著地作禮繞棺
三帀而言我等今日不知佛頭足所在即便
悲哀而說偈言
佛爲三界乘 度於生死淵 憺怕昇泥洹
微妙越世間 佛爲無量明 照於愚癡冥
願爲一切人 顯耀見威靈 佛爲大慈哀

所度無央數 尊體處金棺 清淨寂然安
願用優和德 見身色相光 普今天及人
興起無量福 佛爲開現法 衆生受潤澤
得止生死輪 惑者入正諦 已蒙如來恩
頭面禮佛足 今但覩棺槨 心爲悲感傷
佛雖就無爲 聖達靡不實 見後有疑諍
出足於金棺 起分是生死 佛以不復愁
法身慧常存 莫呼永泥洹

迦葉赴佛般涅槃經

瑜伽翳迦訖沙囉烏瑟尼沙訖訖囉真言安
怛陀那儀則一字頂輪王瑜伽經

唐大興善寺三藏沙門大廣智不空奉 詔譯

真言行者若求安怛陀那應作是念云何我
能速取成就當習是三摩地所謂一切法無
色猶如虛空性自成就作如是勝解當如本
教淨持地等作是三摩地
普徧三千界 充滿智成水 有大寶蓮華
開敷在水中 寶莖如須彌 上方珠網覆
蓮上有大寶 八柱以莊嚴 想成寶樓閣